

15. august 2025

UKA 2025/54

Inatsisartut suleriaasianni § 36 malillugu apeqquteqaat aallaavigalugu oqallinnissamik imaattumik siunnersuuteqarpunga:

Utoqqalinersiallit tamarmik toqqissisimasumik akilersinnaasamillu angerlarsimaffeqartinnissaat qanoq ililluta qulakkeersinnaaneripput pillugu apeqquteqaat aallaavigalugu oqallinnissamik siunnersuut.
(Inatsisartunut ilaasortaq Bo Martinsen, Demokraatit)

Inuiaqatigiit utoqqarnik inooqataasunit sanarfineqarpoq, ukiut qulikkuutaat ingerlanerini nunamut uunga, ilisimasatsinnut asasatsinnullu tunngaviliiniarlutik sulerylussimasut. Allatut oqaatigalugu, utoqqartagut pilliuteqarsimaqaat. Uagut tullinnguuppugut ataqqinninnermik qujaniarnermillu tunissallugit, utertitsiffigalugit.

Qularutissaanngilaq, utoqqarpassuaqarmat akissaalatsisunik. Akit qaffakkaluttuinnartut aningaasaqarnermut isumakulutsitsipput, peqqiilliulernerlu immaqa aamma peqqissutsikkut inuuniarnikkullu isumakulutsitsillutik.

Tassaniluuna, isumaqartunga, uagut inuiaqatigiittut utoqqartagut pitsaasumik utoqqalinissaannut pingaarutilimmik tunngavilernissaanut utertitsiffigisariaqarigut tassalu pitsaasumik, peqqinnartumik aammalu utoqqarnut tulluuttumik ineqartinnissaat, akilersinnaasoq.

Ullumikkut utoqqat ineqarniarnerat pisortaniippoq privaatiinillunilu, inuunermi inissisimanerannut tulluussarneqarpiarani. Taassuma kingunerisarpaa assersuutigalugu, ineqarnermut akiliutip qaffakkaluttuinnarnerata toqqissisimannginneq, aningaasatigut tatisimaneqarneq ajorluinnarpallu inigisamik annaasaqarneq. Tamanna inuiaqatigiittut akuersaartariaqanngilarput. Uani uagut inuiaqatigiittut siulliuttariaqarpagut ileqorissaarneq aningaasaminngarniit.

Qanorilillutami qulakkiissavarput, utoqqaat toqqissisimasunik akilersinnaasanillu illoqartinneqarnissaat?

Eqqarsarpunga, isumassarsiatsialaassasoq, uagut politikkikkut utoqqaat ineqarniarnerat ima eqqarsaatigisalisagipput, soorlu kollegialiornertut. Kollegialiornarit ullumikkut pisortanit ineqarnermut akiliutaat aalajangerneqartarpoq, Namminersorlutik Oqartussat, aalajangertarlugu, ilinniartoq qanoq akiliissanersoq naligiissuseq, tikikkuminarnera inuiaqatigiittullu akisussaassuseqarneq aallaavigalugu. Taaamaaliorneq uagut Demokraatiniit isumaqarfigaarput pitsaasumik qulakkeerinninnerusoq, ilinniartup illinniagaqarnermini, akikitsumik pitsaasumillu ineqarnissaanut.

Iluserluuna taanna, isumaqartunga, eqqarsaatersuutigisariaqaripput utoqqaat ineqarniarnerannut



nuutinnissaa. Akuerisinnaagutsigu, inuusuttut ilinniagaqartut pisortanit taperneqarlutillu aalaakkaasunik ineqartinneqaassasut ilinniagartik naammassissagunikku, aamma akuerisariaqarparput, utoqqartatta assiganik pisariaqartitsinerat, sivisoorsuarmik sulereernerminni.

Politikkikkut ineqarnermut akiliutissatut aalajangigaq toqqissisimanermik pilersitsissaaq utoqqartatsinnut. Qulakkeerneqassaaq, utoqqalinertik qaammatip tulliani akiliutissaqarnerlutik isumakulunnermut atussanngikkaat. Tassungalu ilutigalugu aningaasaqarnerannut pitsanngorsaataassalluni, ineqarnermut akiliut appasinnerusoq aningaasat atorsinnaasat amerlisissammagit taamatuttaarlu inuunerissaarnerulerneq.

Aningaasanuinnarli tunnganngilaq. Aammali peqqissutsimut ataqqinassutsimullu tunngassuteqarluni. Utoqqaat, aalaakkaasuni, tikikkuminartuni toqqissisimanartunilu najugaqartut, nammineernertik attannerusarpat inoqatiminnullu akuliunnerusarlutik. Pitsaasumik ineqarnerup kiserliorneq, isumatsanneq timikkullu nungullariartorneq pinaveersaartittarpaa. Akisuunik paaqqinninnermut- aammalu peqqissutsimut akiliuteqarnissamik pisariaqartitsinermut annikillisaataassaaq, tamannalu utoqqarnut periarfissiissalluni illoqarfigisami akuulluarnissamut.

Uani taakku allaffissornerujussuortalimmik aaqqiissutaassanngillat. Tunngaviusumilli utoqqartatta peqqillutik toqqissisimasumillu utoqqalinissaannik qulakkeerinissallutik.

Qilanaaraara, partiit allat Naalakkersuisullu oqaluuserisaq qanoq isumaqarfigineraat paasissallugu, pingaartikkakku, utoqqartatsinnut pissutsit pitsanngorsarnissaannut suleqatigiinnissarput.